



Sesida dals

Communitgà ils

Protocol nr.

20 d'avust 2019

21 d'avust 2019

585

Incumbensa Schwärzel

concernent plazzas parzialas sin tut ils stgalims dal cader

Resposta da la regenza

La regenza è conscienta dal fatg ch'il chantun sto restar in patrun attractiv – cumpa-reglià cun l'industria privata e cun autras administraziuns – sch'el vul tegnair u recrutar er en l'avegnir las persunas dal fatg ch'el dovra. En quest senn intenziunescha la regenza d'integrar in punct central da svilup "patrun attractiv" en il program da la regenza 2021-2024. La regenza è er da l'avis da las sutsegnadras e dals sutsegnaders ch'il Grischun stoppia tegnair quint dals basegns da las generaziuns actualas e futuras. Latiers tutga er la realisaziun da mesiras per meglierar la cumpatiblad da la professiun cun la famiglia. La direcziun generala, en la quala l'administraziun chantunala ha da sa sviluppar, dastgass correspudentamain esser incontestada. Tar la realisaziun da las singulas mesiras stoi però esser garantì ord vista da la regenza che quellas vegnian concepidas uschia, ch'ellas tegnan quint da las differentas pretensiuns manaschialas, organisatoricas e giuridicas. Ultra da quai vali adina da resguardar che l'administraziun ha en emprima lingia d'ademplir ina incumbensa e da furnir ils servetschs ils megliers pussaivels envers las burgaisas ed ils burgais.

Sco mesira a curta vista pretendan las sutsegnadras ed ils sutsegnaders che tut las plazzas vacantas a temp cumplain da tut ils departaments e da tut ils stgalims da funcziun vegnian publitgadas consequentamain cun in grad d'occupaziun dad 80 fin 100 pertschient. La regenza è pronta da tegnair quint da quest giavisch giustifitgà e da publitgar las plazzas a temp cumplain da l'administraziun chantunala en il futur en il senn da l'incumbensa sco pensums dad 80 fin 100 pertschient, uschenavant che quai è pussaivel resguardond las relaziuns ed ils basegns manaschials ed organisatorics. Excepziuns motivadas duain restar pussaivlas. La regenza parta er dal fatg che quai rendia l'administraziun pli attractiva per dunnas, en spezial en funcziuns da

cader. En quest connex stoi vegnir menziunà che var 37 pertschient da las collavuraturas e dals collavuratur lavuran gia oz en moda parziala.

Las sutsegnadras ed ils sutsegnaders pretendan ultra da quai che la pussaivladad da la telelavor resp. dal lavorar a chasa vegnia promovida e pussibilitada. Els partan dal fatg che quai possia vegnir realisà nunbirocraticamain e senza custs supplementars en moda relativamain simpla e svelta.

Areguard il lavorar en moda flexibla vali da menziunar che var 60 pertschient da las collavuraturas e dals collavuratur han oz in temp da lavor per onn e na ston pia resguardar naginas uras da bloc. En cas singuls ed adina pli savens vegn er pussibilità il lavorar a chasa. Il lavorar a chasa pretenda per regla ina infrastruttura supplementara al lieu da lavor e quai po chaschunar custs supplementars. Er ston la registraziun dal temp da lavor e la segirezza da las datas vegnir resguardadas spezialmain en cas dal lavorar a chasa. Per regla èsi in avantatg da pudair disponer da las collavuratur e dals collavuratur en il biro dal post da servetsch. Pervia da quai è la regenza da l'avis che – avant ch'il lavorar a chasa vegnia introducì dapertut – mesiras per flexibilisar la lavor sco novs models dal temp da lavor ed il lavorar a chasa duain vegnir evaluadas e discutadas en moda generala en il rom da la proxima revisiun da la lescha dal persunal.

Sa basond sin questas explicaziuns propona la regenza al cussegl grond d'acceptar l'incumbensa qua avant maun en quai che concerna la publicaziun da plazzas e da la midar sco suonda en quai che concerna il lavorar a chasa: En il rom da la proxima revisiun da la lescha dal persunal examinescha la regenza las pussaivladads dal lavorar a chasa.



En num da la Regenza

Il president:

Il chancelier:

Dr. Jon Domenic Parolini

Daniel Spadin